



Communicaziun da medias digl cumegn da Surses (nr. 03-2024)

Surses: A Beiva pò neir planisada ena farmada da posta nova conform agls basigns da persungas cun impedimaints

La radunanza communalà ò decidia cun gronda maioritad da cumprar taragn a Beiva, tranter oter per far ena nova farmada da posta adattada agls basigns da persungas cun impedimaints. Ultra da chegl ò la radunanza communalà approvo igl preventiv 2025 e fixo igl pe da taglia communal pigl onn tgi vign. Er divers credits per projects d'investiziun è nias approvos, tranter oter la veia da velos e da viandar "Juliertrail".

Cun 79 cunter 25 vuschs ò la radunanza communalà approvo en credit da CHF 800'000.00 per cumprar dalla Runals Beiva SA (BISAG) 3 parcelas a Beiva. Sen ena surfatscha da radond 770 m² all'antschatta dalla vischnanca sper igl hotel Guidon duess neir erigeida la nova farmada da posta, tgi satisfò agls basigns da persungas cun impedimaints. Agl li actual dalla farmada da posta n'ègl betg pussebel da concepeir ena farmada da posta sainza barrieras percheigl tgi mantga igl plaz. Igl li all'antschatta dalla vischnanca è en li ideal per far la farmada da posta nova. Chegl tant duple an vista agl sviamaint dalla vischnanca da Beiva, postulo digl cumegn anvers igl Uffez federal da veias UVEIAS/ASTRA. Aint igl credit approvo è er cumpiglia la compra digl parcadi "Plan Weis" a Beiva, tgi totga actualmaintg an cumproprietad mez e mez alla BISAG ed agl cumegn. Cun chella compra è igl cumegn siva igl proprietari exclusiv da chella parcella, chegl tgi simplifitgescha considerablamaintg l'utilisaziun digl parcadi agl avigneir.

Igl preventiv 2025

Tar antradas da radond 37.81 miu. francs ed expensas da radond 39.85 miu. francs sa resulta en surple d'expensas da radond 1.95 miu. francs. Chel grond surple d'expensas è d'attribueir agl fatg tg'ins ò risguardo aint igl preventiv ena contribuziun da menaschi da 2 miu. francs alla Center da Sandadad Savognin SA (CeSa SA). Igl onn da gestiun passo ò la CeSa SA musso or en deficit da radond 1.7 miu. francs. Per garanteir alla societad la liquiditad ègl sto necessari da risguardar chella contribuziun da menaschi aint igl preventiv digl cumegn, scu acziunari principal dalla societad. Igl mument vignan manadas discussiuns scu tg'igl deficit da menaschi structural saptga neir redutgia. Sainza risguardar chella contribuziun da menaschi digl cumegn alla CeSa SA ins vess en preventiv angulivo cun en pitschen surple d'antradas da CHF 26'800.00, chegl tgi fiss aint igl rom digls preventivs digls onns precedents.

Las investiziuns bruttas montan a radond 21.45 miu. francs ed investiziuns nettas da radond 16.48 miu. francs e pertotgan cunzont l'infrastructura communalà, vot deir la sanaziun digl provedimaint d'ava e la dismessa d'ava persa, la sanaziun da veias communalas e la construcziun dalla veia da velos e viandar "Juliertrail" tgi colliescha da nov la Val Surses e la Nagiadegn'ota. An connex cun igl preventiv è er nia preschento igl plan da finanzas 2026-2028.

Fixaziun digl pe da taglia

Analog agl onn passo ò la radunanza communalà decidia sainza discussiun da fixar igl pe da taglia per la taglia d'antrada e da facultad digl cumegn da Surses pigl onn 2025 sen 90% dalla taglia cantunala simpla.

Approvaziun da divers credits per investiziuns ed ulteriouras decisiuns

Mintgamai cun gronda pluralitad ò la radunanza communalà approvo tot las dumondas da credit tgi la suprestanza communalà ò sottamess an connex cun divers projects d'investiziun previas igl onn 2025.

Pinavant ò igl suveran approvo la revisiun parziala dalla planisaziun d'utilisaziun "Juliertrail" ed ò decidia da desister da fixar restricziuns pertutgont las quotas per la vendita d'immobiglias a persungas digl exterior pigl 2025, conform alla practica actuala.

Ulteriouras infurmaziuns dat igl mastral Daniel Wasescha (telefonign 079 709 24 28)

Tinizong, igls 10 da december 2024